



*Senen, 09 Oktober 2023*

**Ogen: Obaja 1:17**



**Nangkeng Ku Deleng Sion**



**M**esikel berkat ku ingan si mereken ketenengen, perlindungan, erkiteken tekanen geluh si meberat em jadi sada perayaken bangsa Juda. Paksa si e bangsa enda ngenanami pagitna geluh erkiteken itaban janah iangkut ndarat nadingken kuta Jerusalem. Ngeluh selaku kalak tabanen, dinging dem i bas kesusahen. Bas kesusahenna, lit ka si ndarami untung e me bangsa Edom. Irapasna barang-barang kalak Juda seh maka ertidih-tidih kiniseran sinialaken. Si enda ngerehken rawa dinging ukumen bas Dibata nari kap.

Obaja selaku nabi bas paksa si e, ernubuat maka kalak si puluh i bas ukumen nari, nangkeng ku Deleng Sion. Ingan e badia, ingan Dibata nehken pasu-pasuNa. Ingan enda jadi sekerajangen bangsa Dibata. Janah kerina si jadi kerajangen bangsaNa e si enggo ndube irebut iulihken Dibata bas paksana. Arah nubuatan Obaja enda tole banci sirenungken maka Dibata la sinik nandangi perbahanen si la mehuli. Kalak si enggo irampas hakna, iperdiateken Dibata. Alu kuasaNa si mbelin iulihkenNa kai si jadi kerajangen bangsaNa. Kemenangen e jadi sekerajanggenna aminna pe ia itebu-tebu kalak sideban. Obaja mulihi mereken rumat (penjemba) maka kalak puluh i bas kiniseran e nari nangkenglah ku Deleng Sion. Ingan jumpa ras Dibata, ngaloken Kata Dibata dinging ngaloken pasu-pasu.

Moria sikelengi Tuhan, genduari i ja kin Deleng Sion e? I bas ingan sipejumpaken kita ras Dibata, maba ketenengen. I je me sidatken perasaan aman, terkelin ndauh bas kerina tekanen. Enterem kalak si ndaramisa tapi la idatkena. Terdaram-daram ku jah ku jenda tapi banci saja lalap la jumpa rassa. Deleng Sion e me perjumpanta ras Dibata. IA e si engkawali kita katawari paksa pe, mereken ketenengen dinging kedamen si tuhu-tuhu kap. Jumpai dinging dahilah IA, subuk arah paksa teneng, kebaktin-kebaktin si lit ras sidebanna.